



Jungi  
Rotstab

Fasnecht 2019



## Mehr Märt – Mehr Fasnecht

Lieschtel isch jetzt richtig gross,  
z'Lieschtel, dört isch öbbis los.  
Lieschtel isch jetzt öbbis wärt,  
Lieschtel het dr Super-Märt!

Am Samschtig hets im Stedtli Lüt,  
am Samschtig lauft jetzt nümme nüt.  
Am Samschtig muesch im Stedli syy,  
dr Gnussmärt isch dr «Place to be».

Am Gnussmärt, dört chasch alles chaufe,  
oder chasch au eifach umelaufe.  
Am Gnuessmärt chasch dis Znacht go shoppe,  
dr Gnussmärt, de duet alles toppe!

Produkt sind, das isch genial,  
knackig, früschi und regional.  
Nit so Fast-Food-Big-Mac-Schund,  
sondern Bio-Slow-Food-supergesund.



Am Gnussmärt, dört chasch alles ha,  
vo Chopfsalat mit Schnäggli dra,  
zu Würscht, vo Hand in d'Pelle gstopft,  
und Wyy vo Hand in d'Fläsche tropft.

S'gitt Lauch und Chnobli früschi vom Acker  
und Blueme für di Tinder-Macker.  
S'hett Händöpfel no mit dr Ärde  
wo bi dir dehei zur Gratin wärde.

S'git Ziibele im Jute-Seckli,  
früschi, warmi Bio-Weggli,  
Toamte-Sugo us Lieschtler Produktion,  
und Bier, braut mit Tradition.



Es git au Chirsi, süess und rot,  
und saisonal au Biire-Brot.  
Das beleisch den, bisch e Maa,  
mit Bluetwurscht vom Stand nebedra.

S'git Beeri zum direkt grad ässe,  
nit vo Spanie, chasch's vergässe,  
sondern direkt vom Hügel obe,  
dis ökologisch Gwüsse duet das loobe!

Wenn öbbis willsch gar richtig gesund,  
chauffsch Spargle grad im zähler-Bund.  
Die duet dr Buur vo Hand us em Bode hole!  
(oder macht das dr Arbeiter us Pole?)

Im Herbscht gits Öpfel früschi vom Baum,  
samt Würmli, s'isch e Öko-Traum.  
Die sind voll mit Vitamin,  
und ere Extraportion vo Protein.

Statt im Internet Apple-Produkt bstelle,  
chasch e Rekord im Öpfel-verdrucke ufstelle.  
Statt uf em Handy Farmville zocke,  
losch di vo echtem Gmües lo locke.

Am Gnussmärt, dört gits Stand an Stand  
-jetzt ohni störende Trottoirrand-  
die beschte Produkt vom Baselbiet,  
ke Wunder, dass das d'Lüt aazieht.

Die ströme denn in d'Rothuusstroos  
und wärde ihre Chlütter los.  
S'het soviel Lüt, me chönnt erwarte,  
dass dr Cheinbäse jetzt denn grad duet starte.

Dank Gnussmärt chunnt eim jetzt s'ganze Joohr,  
s'Stedtli wie ar Fasnecht vor.  
D'Stimmig glücklich, alli froh  
jä, so loht's sich läbe doh!



Wötisch au emool lehre drummle oder pfyffe,  
duesch eifach zum PC gryffe,  
und gisch ii: [www.rotstab-clique.ch](http://www.rotstab-clique.ch)